

միայն պարտեզը, այլ պահպանում էր մի մշտական զովութիւն, որ ազատում էր բնակիչներին ամառային տօթերից:

Առհասարակ այդ հնացած եւ մաշոած տունը իր ընդարձակութեամբ դարձեալ մեծ յարմարութիւն ունէր քեռուս հոյակապ ընտանիքի համար, որ կազմուած էր բազմաթիւ անդամներից: Մեծ քեռիս, այսինքն մօրս հայրը, դեռ կենդանի էր. նրան բոլորը դադայ (հայր) էին կոչում: Նա հինգ որդի ունէր, բոլորը ամուսնացած, բոլորը բազմաթիւ չափահաս եւ անչափահաս զաւակների տէր էին: Մայրս իր եղբայրների միակ քոյրն էր: Առհասարակ մի հատիկ քոյրը միշտ սիրելի է լինում իր եղբայրներին, բայց մօրս վերաբերութեամբ ընդհակառակն էր պատահել: Մայրս այն հազոագիւտ բնաւորութիւններից էր, որին անկարելի էր չսիրել: Բայց ի՞նչ էր պատճառը, որ նրա եւ իր ազգատոհմի մէջ տիրում էր մի տեսակ խուլ սառնասրտութիւն, մի տեսակ ծածուկ անհամակրութիւն, որը իսկոյն աչքի էր զարկում: Այստեղ մի գաղտնիք կար, որ ինձ համար այն ժամանակ անհասկանալի էր, թէ եւ չէի կարող չնկատել, որ քեռիներս խիստ անտարբերութեամբ ընդունեցին իրանց քրոջ ամուսնու մահուան ցաւալի բօթը, եւ կարծես ուրախ լինէին, որ աստծու արդար դատաստանը վերջապէս պատժեց նրան: Այդ էր պատճառը, որ մեզ պատահած դժբախտութիւնից յետոյ մայրս խիստ դժարութեամբ յանձն առեց իր եղբայրների մօտ բնակոյիլ, եւ եթէ անճարութիւնն ու աղքատութիւնը չստիպէր նրան, գուցէ այդ ծանր զիջողութիւնը չէր անի:

Քեռուս տան այն մասը, ուր տեղաւորեցին մեզ, բոլորովին զուրկ էր ծառերից: Այստեղ գտնուում էր ակոռատունը, որի բակի մէջ կար փոքրիկ խրճիթ բաղկացած մի սենեակից եւ նախասենեակից, որ շինուած էր ծառաների համար: Եւ որովհետեւ այժմ քեռիս ծառաներ չուներ, խրճիթը մնացել էր բոլորովին անբնակ. այնտեղ պահում էին տան կոտրատուած եւ անախտանացած կարասիքը: Այդ մթերքներին փոխարինեցինք մենք, որ մեր վիճակով շատ չէինք տարբերում նրանցից: Այնուամենայնիւ, մենք գոհ մնացինք մեր բախտից, մաքրեցինք խրճիթը իր հին ապականութիւնից, շինեցինք եւ սարքեցինք նրան, թէւ քայքայուած առաստաղը եւ խարխուլ պատերը բոլորովին անզօր էին անձրեւի հոսանքի առաջը առնելու, կամ պահպանելու մեզ վատ եղանակից:

Գ. ԶԻՆ ՄԵՂԵԸ

Աշունը մօտենում էր իր վախճանին: